

四庫全書

子部

欽定四庫全書

冊府元龜卷一百六十

宋 王欽若等 撰

帝王部

革弊第二

唐德宗大曆十四年五月癸亥即位六月己亥朔赦書
應士庶自艱難以來田宅踰制車服奢侈仰所司詳前
後格勅明立法度王公百官既處榮班宜知廉慎如聞
坊市之內置邸舖販鬻與人爭利竝宜禁斷仍委御史

臺及京兆尹糾察七月壬申毀元載馬璘劉中翼之第
自天寶中京師堂寢已極弘麗而第宅未甚逾制然魏
國公李靖廟已為嬖人楊氏廐矣及安史二逆之後法
度摧壞大臣宿將競崇棟宇臺榭之飾無復界限力窮
乃止人謂之木妖而馬璘之堂尤甚計錢二十萬貫他
室稱是既而璘卒於軍以喪歸京師士庶欲觀其宏麗
假名於故吏投刺會弔者數十百人故命撤毀之自是
京師樓榭之踰制者皆毀

七月己卯令王公百官及天下長吏無得與人爭利先於揚州置邸肆貨易者皆罷之先是諸道節度觀察使以廣陵當南北之衝百貨所集多以軍儲貨販例置邸肆名託軍用實私其利焉至是乃絕

貞元三年十一月壬戌罷浙西雜罰錢初浙西觀察使王緯以諸州人吏為前使韓滉所濫罰錢凡欠十八萬滉留府吏何士幹奏請徵以進奉緯抗疏曰滉懲人吏皆是罰錢格式正贓流徒合免况多雜罰身已當辜縱

有欠繫僅存家資估賣盡以混至苛至切比年猶徵
不得臣自發上都煩言載路及到所部有所傳聞臣謬
寄方隅特蒙天造奉辭之日親承德音令臣開闢田疇
安輯黎庶豈敢流毒無告勤人自容特請停徵以綏下
土從之

順宗以貞元二十二年正月丙申即位二月甲子大赦
制舊事官中所要市外間物令官吏主之與人為市隨
給其直貞元末以宦者為使抑買人物稍不如本估末

年不復行文書置白望數十百人於兩市及要關坊闕人所賣物但稱官市則斂手付與真偽不復可辨無敢問所從來及論價之高下者率用直百錢物買人直數千貫物仍索進奉門戶及腳價錢人將詣市至有空手而歸者名為官市而實奪之嘗有農夫以驢負柴至城賣之遇內官稱官市取之纔與絹數尺又就索門戶仍邀以驢送柴農夫啼泣以所得絹付之不肯受曰須要汝驢送柴至內農夫曰我有父母妻子待此然後食今以柴與汝不敢求直而歸汝尚不肯我有死而

已遂毆內官街吏擒以獻詔黜此內官而賜農夫絹十疋然官市亦不為之改易諫官御史數奏疏諫不聽帝初卽位卽禁之及大赦又明禁焉又貞元中內要乳母皆令選京城寺觀婢以充之而給與其直例多不中選寺觀次當出者皆賣產業無業割院及地賣之貴買有姿貌者以進其徒苦之及此亦禁焉貞元末五坊小兒張捕鳥雀於閭里者皆為暴橫以取人錢物至於張羅網於門不許出入者或以張井上使不得汲者近之

輒曰汝驚供奉鳥雀即痛毆之出錢物求謝乃去或相聚歛飲食於酒食之肆醉飽而去賣者或不知就索其直多被毆罵或時留蛇一囊為質曰此蛇所以致鳥雀而捕之者今留付汝幸善飼之勿令饑渴賣者媿謝求哀乃攜挈而去帝在春宮時則知其弊嘗欲禁之及即位遂推而行之人情大悅

憲宗永貞元年九月己巳罷教坊樂人授正員官之制元和七年二月癸丑詔自今應有入蕃使不得與私覲

正員官別給錢物以充私覲舊使絕域者許鬻十數員
官取貲以充私覲蓋優假遠使然殊非典法至是革焉
八年四月乙未罷宣徽院樂人所借官宅自貞元己未
選樂工三十餘人出入禁中號宣徽院長入供奉皆假
以官第每奏伎樂稍稱旨輒蒙厚賜及帝即位令分番
上下更無他賜至是收所借宅

九月詔曰比聞嶺南五管并福建黔中等道多以南口
餉遺及於諸處博易骨肉離析良賤難分念茲遠人受

抑無告所以去歲處分諸道不令進獻近因賂遺事覺方驗詔旨不行雖量輕重各正刑典猶慮未降明勅尚有因循自令嶺南諸道輒不得以口餉遺及將諸處博易又有求利之徒以口博易關鎮人吏容縱頗多竝勒所在長吏嚴加捉搦如更違犯必重科懲如長吏不存勾當委御史臺察訪聞奏因是宣罷口臘等使

九年十一月丙子詔如聞比來京兆府每及臘日府縣捕養狐兔以充進獻深乖道理既違天性又勞人力自

今已後宜竝停

十一年十一月壬申門下省奏諸道奏事官非急切者不得乘驛馬從之時未班師詔命曰宣泊諸軍之奏請所至驛騎不足以充傳州縣發公私乘以濟之中使力奪道中往來馬有餘則驅之以行拒者輒毆辱之雖執公券銜王命至大鎮賓倅或為其陵折於是有繇經山谷歷崎險冒莽蒼而行都邑大道乘者幾絕中人每至之處又遣驛吏搜發往來私馬驛吏因執馬求賂厚者

免之甚為時害

十三年十二月辛亥詔左右龍武六軍及威遠營應納課戶共一千八百人所請衣糧宜勒停仍各委本軍具姓名牒送府縣收管自貞元已來長安富戶皆隸要司求影庇禁軍挂籍者什五六焉至有恃其多藏安處闌闌身不宿衛以錢代行謂之納課戶至是禁絕

十四年二月壬申詔如聞諸道州府長吏等或有本任得替後於當處置百姓莊園舍宅或因替代情庇便破

除正額兩稅不出差科自今已後有此色竝勒依元額
為定

穆宗元和十五年正月辛丑即位二月丁丑敕詔如聞
度支鹽鐵院等所在影占富商高戶庇入院司不伏州
縣差科疲人偏苦事轉不濟如有此色仰當日勒歸州
縣

文宗以寶曆二年十二月乙巳即位庚申詔曰蓋君天
下者莫尚乎崇澹泊子困窮遵道以端本推誠而達下

故聖祖之誠以慈儉為寶大易明訓垂簡易之文未有
上約而下不豐欲寡而求不給朕以眇薄遭逢內難刷
君父之仇耻據億兆之哀寃而股肱大臣羣卿庶士弘
義抗請至于再三以圖宗社之安以答華夷之望俯從
衆欲夙夜震兢思所以克己復禮修政安人宵興匪寧
旰食勞慮夫儉過則酌之以禮文勝則矯之以質庶乎
俗登太古道洽生靈儀刑邦家以化天下長春宮見在
斛斗及絲草席等依前戶部收管鄆縣漢陂鳳翔任谷

地竝還府縣教坊樂官翰林待詔伎術官并摠監諸色
職事中冗員者一千二百七十人竝宜停廢摠監中一
百二十四人先屬諸軍各竝歸本營先供教坊衣糧一
百分廂家及諸司新加衣糧三十分竝宜停給應緣田
獵鷹雛獸犬等竝宜放除五坊加配諸道鷹鷄等長慶
已來嘗進外宣索自今已後一切停進其須備蒐狩量
留者宜准憲宗朝故事其今年新宣附食度支衣糧小
兒一百人竝宜停罷應別詔宣索纂組雕鏤不在常貢

內者竝停度支鹽鐵戶部及州府百司應供官禁年支一物以上竝准貞元額為定度支檢勘具元和以來加配合停色數二十日內分析聞奏先造供禁中牀榻以金飾瑟瑟雜寶鈿真珠瑪瑙裝者悉宜停進東頭御馬坊毬場宜却還左龍武軍其殿及亭子令所司折收餘舍竝賜龍武軍收管應行從處張設不得用花臘結綵華飾今年已來諸道所進音聲女人各賜束帛放還本道應城外墳墓先有開斫道路以備行幸處宜令兩軍

及府縣曉示百姓任其修塞於戲昔漢文顧十室之產而天下乂安我太宗皇帝勤四海之理而帝業隆盛暨乎列聖罔不承式而歲代滋乂訛弊以生仍屬艱故未遑改作朕祇荷重器思臻大寧將正躬以立訓爰取新而革故咨爾百辟卿士外服侯衛其喻朕意永堅乃心無縱慾而敗度自底身於不類率是教典用交修焉布告中外咸使知悉上登極纔踰旬日蠹弊所革出自宸旨中外慶抃見貞觀之風復行於今矣

太和二年十月勅嶺南福建桂管邕管安南等道百姓
禁掠賣餉遺前後勅制處分重疊非不分明近日衛中
行李元志等雖云買致數實至多宜令本道舉行元和
四年閏三月五日及八年九月十八日勅文切加約勒
逐道各著判官一人專知即定名聞奏如已後發覺當
重加貶降

五年十月中書門下奏應屬諸使內外百司度支戶部
鹽鐵在城及諸監院畿內并諸州監牧公主邑司等將

健官典所繇等准承前例皆令先具挾名勅牒州府免
本身色役自艱難已後事或因循多無挾名自補置恣
行影占侵害平人自元和二年長慶元年寶曆元年太
和三年前后赦令約勒皆令條疏及勒具挾名聞奏所
司竟未遵行姦弊日深須有釐革况聖王在上百度惟
新内外有司悉心奉法改更制置今也其時臣等若又
依違蒼生何由蘇息望合令本軍本使本司勘會據元
勅元管數額合食衣糧資課糧料人具挾名補置年月

鄉里分析聞奏此外不得更有影占自此之后有逃死
補替仍每年終具替人挾名闕聞奏其挾名限勅下三
箇月內聞奏畢左右神策六軍威遠營除請依餘一切
委本軍條疎理訖具數聞奏其餘諸司諸使竝令御史
臺勾當依限申奏仍切加訪察勿許因循從之

七年七月勅諸道如有兵革水旱州府殘破及不存濟
為遠近所知者除朝廷特有借賜外輒不得自請賞設
錢物又諸道戎帥除替后倉庫便屬后人賞設三軍須

待新使近日皆有留別賞給自行私惠頗紊朝章向後諸道節度觀察使除替后竝須待新使賞設不得更有留別

九年十二月丁丑東川節度使馮宿奏准勅禁斷印厯日版劔南兩川及淮南道皆以版印厯日鬻於市每歲司天臺未奏頒下新厯其印厯已滿天下有乖敬授之道故命禁之

開成元年正月戊辰勅度支自此後不得收貯材木如

或宣索即以其直市供諸色作料亦如之

先是度支奏
舊管右神策

軍及諸色人假商人名中納材木計支賈直三十三萬
二千四百餘貫所置材木並無至者御史臺推鞫皆王

璠受王守澄輩請
託中納故有是命

十二月戊申詔曰仕雜工商實因鬻爵尚須命使改以
賜材其入蕃使舊例與私覲官十員宜停別與錢五十
貫交令度支分付永為定例

二年十月詔天后所撰十二字並却書其本字

十二月丁未詔曰制服輕重必資典禮如聞往者駙馬

嘗為公主服三年緣情之義殊非故實違經之制今乃

聞知宜令行杖用通制便為定議

時駙馬杜悛以公主薨日近除官未謝帝

問戶部侍郎李以近例奏聞因言士族不願為國戚蓋由此也帝聞之大驚遂遽下是詔

三年九月癸未詔曰左右神策所奏將例改轉比多行牒中書門下便復奏處起今已後宜令軍司一一聞奏狀到中書然後檢勘進覆自開成初軍人奏官多不先聞奏轉遷相次僅無虛日至是方釐革之

四年六月己丑中書門下奏請停堂厨捉錢官從之

是先

宰相厨廣召富人以殮錢散配息利謂之堂厨捉
錢官影占富豪為弊日久至是宰臣楊福請罷之

武宗會昌元年正月赦節文每有過客衣冠皆求應接
行李苟不供給必致怨尤刺史縣令但取虛名不惜百
姓夫畜皆配民戶酒食科率所由蠹政害人莫斯為甚
宜委本道觀察使條疏量縣大小及道路要僻各置本
錢逐月收利或前觀察使刺史前任臺省官不乘館驛
者許量事供給其錢便以留州留使錢充每至季冬申
觀察使如妄破官錢依錢料配竝同入已贓論仍委出

使御史糾察聞奏

宣宗大中四年五月御史臺奏所在物產自有時價官人買賣合准時宜近日相承皆置供應戶既資影庇多是富豪州縣科差盡歸貧下不均害理為弊頗深自此已後委觀察使嚴加覺察宜竝禁斷切慮諸道州府尚有此色諸各牒諸州府勘會巨細申臺以憑鞠理從之六年十二月勅准開元十三年八月十四日及太和八年二月十三日勅文虜耳稱冤先決四十然後依法勘

當近日無良之徒等閒詣闕勢耳每驚勿聽皆為抱冤
及令推窮多是虛妄若不止絕轉恣克狂宜自今以後
應有人欲論訴事自審看必有道理即任自詣闕及經
臺府披訴當為盡理推勘不令受冤更不得輒有自臥
皆勢耳前有犯者便准前勅處分後配流遠處縱有道
理亦不為申明

時御史臺奏覆驗稱冤人澹進通
妄勢耳稱冤廿伏科罪故降是勅

唐莊宗同光二年二月制鄉村糴貨斛斗及賣薪炭等
物多被牙人於城外接賤糴買到房店增價邀求遂使

貧困之家嘗買貴物稱量之際又罔平人宜令府縣及御史臺於諸門嚴切條疏不得更令違犯又國以人為本人困則國何所依人以食為天食艱則人何以濟蓋聞偽朝已來恣為掊斂至於雜色斛斗柴草受納倉場邀頡人戶分外課求納一斗則二斗未充納一束則三束不充互相蒙蔽上下均分疲弊生靈莫斯為甚自今已後仰長吏選清強官吏充主納仍須嚴立條制以防姦欺兼其逐色所納加耗申奏當官者宜守於朝章力田

者宜尊於王制苟容僥倖必亂規繩訪問富戶田疇多
投權勢影占縣州不敢科役貧下者更代征徭轉致彫
殘最為蠹弊將安疲瘵須擇循良者

明宗天成元年四月誅租庸使孔謙停租庸名額依舊
為鹽鐵戶部度支三司委宰臣豆盧革專判中書門下
奏請停廢諸道監軍使內局司租庸院大程官出放猪
羊柴炭戶括田竿尺一依偽梁度制仍委節度使通田
三司不得差使量檢州使公廨錢物先被租庸院一切

管係今據數却還州府州府不得科率百姓先遇赦所
放逋稅租庸違制徵收並與除放今欲曉告河南府及
諸道准此施行從之

九月都官員外郎于鄴奏請指揮不得書契券輒賣良
人從之

二年六月詔以僧尼不歸寺院競占民舍以居之訛濫
日甚勅除名額寺院外無堂殿佛像者竝勒毀之

三年八月以山南西道久從偽命有不益於國患於民者六

事咸命除之

是月帝聞隨鄧復郢均房之間父母骨肉有疾以竹竿
遙致粥食於病者之側出嫁女父母有疾夫家亦不令
知聞哀始奔喪者勅曰萬物之中人曹為貴百行之內
孝道為先凡戴北辰竝遵皇化備聞南北多爽時風皆
傾事鬼之心不守敬親之道於父母如此無行披日月
何以立身弊久積於鄉閭化全繇於長吏昔西門豹一
縣令耳尚能投巫百姓保女子之愛絕河伯之虞斷自

一時傳於千古况位居侯伯化洽封廵豈不能宣北闕之風變南方之俗宜令逐處觀察使刺史丁寧曉告自今以後父母骨肉有疾者竝須日夕專切不離左右看侍使子奉其父母婦侍其舅姑弟不慢於諸兄姪不怠於諸父母如或不移故態老者卧病少者不勤事奉子女弟姪竝加嚴斷出嫁女父母有疾不令知者當罪其夫及其舅姑

閏八月吏部郎中何澤請廢戶部蠲紙奉勅日月流行

之處王人億萬之家既絕煩苛無濫力役唯忠孝二柄
可以旌表戶門若廣給蠲符深為弊事昨日所為地圖
方域逐閏重疊上供州郡之中皆須厚斂而猶尋降誡
東竝勒廢停今此倖端豈合更啟逐年蠲紙宜令削去
四年六月己丑勅自天成續紹之初曾降勅應隨駕竝
內外將校職員許奏名銜當議遷陟俾行賞舊之恩以
報惟新之命自後累據奏薦人數及多已經數載尚有
奏陳既是論乞新恩豈宜積年申奏兼恐有後來補署

纔改職名更望官員因爭爵命若無止絕慮啟倖門此
後諸州諸使不得更有論請新恩如是顯立功勞要行
酬獎即委本處長吏持具奏聞酌其績效當議施行夫
爵賞之權國家利器頃因多事散以賞功苟利社稷夫
何愛焉近緣肆赦萬方陪臣例許陞轉且聞亂離已前
諸節度州職掌自兵馬使已上或因立效或遇覃恩許
奏乞憲銜每使不過十數人矣軍府有額守之不踰自
偽梁已還侯伯無考秩每將去任遷補不常至於守門

掌庫簡札小胥卜祝優倡例稱轅門劇職奏請天命少則二三百通多則五六百通三公八座之秩往往有焉金章紫綬不間於小胥賤吏於此之中猶多謬濫帝知其事故令止之

長興元年七月勅訪聞諸道州縣官自銜虛名不惜人戶皆於省限已前行帖催驅須令人戶貴買充納且徵科租賦乃是常規所務事集人安不必急徵暴斂况累降勅命非不丁寧只據規程勿令踰僭此後為徵科事

辦亦不酬勞本州不得申奏如違限稽慢即准條疏責
罰如灼然添得解署招得流民無害於公私者可具事

繇申奏固得持行優獎

初同光時租庸使孔謙起自胥徒不知大體方中原未平所利

財賦辦集乃奏請州縣官有徵科先可者則行恩獎或與檢校官或賜章服繇是長吏競為苛刻於省限前卒徵暴斂以希曲恩或蠶未繭而欲絲麥初芒而督稅皆出利求取其費數倍人皆哭泣而末訴自天成已來猶仍舊轍長吏以此成風計司奏請無已時政懲其如是屢奏改革猶未能杜其倖門惜哉又勅京百

司不許影庇州縣戶人虛出課利

二年四月夏詔罷州縣官到任後率斂為地圖

五月詔曰近聞百執事等或親居內職或貴列廷臣或
宣達君恩或勾當公事經繇列鎮干撓諸侯指射職員
安排親昵或潛申意旨或顯發書題自今之後一切止
絕有所犯者發薦人貶官求薦人流配如逐處長吏自
徇人情只仰被替人詣闕上訴長吏罰兩月俸發薦人
加一等被替人却令依舊

末帝清泰二年五月庚戌詔曰朕聞竒伎淫巧增費損
功古先哲王嘗戒其事朕憲章百代臨御萬方以其欲

致延洪必絕驕奢之漸將期富庶須除蠹耗之原每務實以去華期化民而成俗近者諸色進奉寶裝龍鳳雕鏤刺作組織之異曾經釐革尚敢踰違宜在舉行貴於遵守今後此色物諸處不得進奉所繇司不得輒通

晉高祖天福元年閏十一月壬午勅曰竒伎淫巧往誥不容務實去華哲王所尚應有浮虛假偽之物不得鬻於市肆委所在嘗加覺察犯者重加刑責

二年九月將作少監高鴻漸奏伏覩近年已來士庶之

家死喪之苦當殯葬之日被諸色音聲伎藝人等作樂
求覓錢物伏乞顯降勅文特行止絕或所在官吏等通
容不與覺察請行朝典勅喪葬有期哀情慘極其或舉
樂可謂乖儀始因伎藝苟求遂致澆訛漸起所陳章疏
頗正時風宜下有司永令止絕

十月詳定院奏前洺州鷄澤縣主簿范恕進策五件可
行者有二其一云伏見諸道行遣公事皆有前後通規
定知後所繇置遞符脚力每遇緩急嘗遣往來既有嚴

程孰敢慢事近日州使多差牽攏散從承符步探官等
下縣追督公事始發一替專人又致續催使者事則一
件兩件使乃五人七人非唯剝削蒸黎實為撓煩縣邑
及官吏無暇區分庶事唯當祇奉專人如此弊訛特望
條貫若令佐稍虧職分或後公期顯有憲章請行法典
其二曰自前兩稅徵賦已立三限條流官員懼殿罰之
威節級畏科懲之罪苟非水旱敢怠區分未嘗有不了
之州何處是不前之縣臣今覩諸道省限未滿州使先

追仍勒官員部領胥徒云與倉庫會探務行誅剝因作瘡痍全無軫恤之心但資貪求之意外邑所繇等不免牽費非理盤纏例總破家皆聞逃役自今之後伏乞只憑倉庫納數點算便即委知仍取縣司申聞勘會以明同異若實違省司期限請依常典指揮會探之名特乞停寢者臣等叅詳范恕所陳事件要絕煩苛當務息民以俾求理誠為允當望賜施行從之

少帝開運二年秋左諫議大夫李元龜奏請禁止天下

僧尼典買院舍從之

晉高祖天福十二年左衛將軍許敬遷奏臣伏見天下
鞍轡器械竝取契丹樣裝飾以為美好安有中國之人
反效異域之俗請下明詔毀棄須依漢境舊儀勅曰近
年中華兆人浮薄不依漢禮却慕殊風果致狂兵來侵
諸夏應有契丹樣鞍轡器械服裝等竝令逐處禁斷

隱帝乾祐二年國子司業樊倫上言游惰之民多歸僧
舍朝廷用兵須豐軍食請三五年間止絕僧尼戒壇兼

禁私行剃度從之

乾祐三年九月甲申詔諸道州府自行軍副使已下至令錄佐掾不得於本部內影庇人戶名為伏事自是州縣舊舍職役人除籍放之

周太祖廣順元年正月制天下諸侯皆有親校自可慎擇委任當必裨奉朝廷若更別差理或未當宜矯前失庶協通規其先於在京諸司差軍將充諸州郡元從都押衙孔目官內知客等竝可停廢

三月壬申勅前朝於諸州府差散從親事官等前朝創
置蓋出權宜苟便一時本非舊貫近者徧詢羣議兼採
封章具言前件抽差於理不甚允當一則碍州縣之色
役一則妨春夏之耕耘貧乏者困於供須豪富者幸於
影庇既為煩擾須至改更况當東作之時宜罷不急之
務其諸州所在差散從親事官竝宜放散自遂田農自
去年四月已前州縣元管係人數一切如舊其遞舖如
已前招到者且仰仍舊今後更不得招名其諸處場院

竝不得影庇兩稅人戶所有河北諸州及澤潞晉絳磁
隰解等州於先差散從親事官內選到弓箭手只且留
在本州管係其餘放散

先是漢隱帝於諸州府百姓內
差親事散從官又差力及戶充

遞舖又下三司諸場務召百姓替占役兵
士帝心知其不便乃下詔革馬公私使之

四月皇子鎮寧軍節度使榮

卽世宗

言屬州帳內有羊猪

紙炭等戶并羊毛紅花紫草及進奉官月科竝是影占

大户凡差役者是貧下戶今竝欲放免為散戶詔褒之

曰卿作鎮王畿留心政道雖米鹽細務不懈於躬親而

會斂無名盡思於蠲放能惠窮困深協眷懷已降宣命
指揮使竝放為散戶

二年四月勅諸縣鎮令佐鎮將不得乞年許人糾告

八月甲午勅諸州縣吏民緇黃繼來詣闕留舉刺史縣令牧宰
之任委寄非輕繫烝庶之慘舒布朝廷之條法若庶勤奉
職撫字及民自有政聲達於朝聰何勞民庶遠致舉留
既妨農養之時又耗路途之費所宜釐革免致勞煩今
刺史縣令顯有政能觀察使審詳事狀朝廷當議獎昇

百姓僧道更不舉請一切止絕

十月庚申詔諸州或罷任或朝覲不得以器械進貢先是諸道州府各有作院每日課定造軍器逐季般送京師進納其逐州每年占留係省資金不少謂之甲科仍更於本部內廣配土產物又徵歛數倍部民苦之除上供軍器外節度使刺史又私造器甲以進貢為名功費又倍悉取之於民戶帝以諸州上供器甲造作不精兼占留屬省物用過多乃令罷諸州作院詔藩侯郡牧罷貢

器甲仍選擇諸處作工赴京作坊以備役使辛丑詔諸道州府所差知館驛人不得於縣界別差人戶貼助致擾貧民

十一月丙午勅曰古者封樹之制定喪葬之期著在典經是為名教洎乎世俗衰薄風化陵遲親歿而多闕送終身後而便為無主或羈束於仕宦或拘忌於陰陽旅櫬不歸遺骸何託但以先王垂訓孝子因心非以厚葬為賢只以稱家為禮掃地而祭尚可以告虔負土成墳

所貴乎盡力宜頒條令用警因循庶使九原絕抱恨之
魂千古無不歸之骨搢紳人士當體茲懷應内外文
武臣寮幕職州縣官選人等今後有父母祖父母亡歿
未經遷葬其主家之長不得輒求仕進所繇司亦不得
申舉解送如是卑幼在下者不在此役其合赴舉選者
或是葬事禮畢或是卑幼在下勒於納家狀內具言不
得因冒宜令御史臺及逐處長吏本司長官所繇司覺察
糾舉違犯者當行典憲如是不切覺察縱任因冒罪在

糾舉司其中有兵戈阻隔或是朝廷特恩除拜起復追徵及内外官職員皆以金革從事並不拘此例所有勅前見任職員官今年舉選人等不在糾舉之限

是月鳳翔言義州蕃部買牛入蕃多是宰殺乞止絕沿路州縣道路百姓不得殺牛貨賣與蕃人從之

二年五月勅榜宋州曉諭管内諸縣民等省節度使嘗思所進絲四萬一千四百七兩言出放在民例以五月內徵納其絲並還元契除放如已納到者委巡檢使柴

進據使追戶責領歸勝到速告報知委

世宗顯德三年十一月勅廢天下淫祠仍禁擅興祠宇
如有功績灼然合建置廟貌者奏取處分自是諸道奏
不合典禮而享廟食者咸毀之

五年正月尅復淮南詔免濠泗楚海揚康滁和等州管

內罪人及蠲其殘稅轉徵科率之物

先是州人於兩稅外以茗茶及鹽柳

配戶民令輸繡帛稻米以充其直謂之轉徵又歲率羊
羸薪炭之類人甚苦之帝以尅復之始悉命除放民情

悅甚允
蘇之望

冊府元龜卷一百六十

欽定四庫全書

冊府元龜卷一百六十一 宋 王欽若等 撰

帝王部

命使

周官小行人之職達六節辨五物以周知天下之故其往也賦皇華以遣之其還也歌四牡以勞之蓋所以重宣命之寄慰于役之勤斯古道也得非王者居九重之深御四海之廣慮下情之未達懼一物之失所繇是慎

擇其人俾專厥任若乃察謠俗采方言賑卹孤窮興舉
孝秀辨庶士之淑慝平羣盜之倣擾至有乾文謫見天
灾流行或推賜租之恩或舉申究之典斯皆因時立制
以裨政治者也

周平王四十九年使凡伯聘魯

桓王六年使南季聘魯

十二年使宰渠伯糾聘魯

宰官渠氏伯糾名也王官之
宰當以才授而伯糾攝父之

職出聘列國
故書名譏之

十三年使仍叔之子來聘魯

漢武帝元狩元年詔曰朕嘉孝悌力田哀夫老眊孤寡
鰥獨或匱於衣食甚憐愍焉其遣謁者巡行天下存問
致賜曰皇帝使謁者賜縣三老孝者帛人五疋鄉三老
弟者力田帛人三疋年九十以上及鰥寡孤獨帛人二
疋絮三斤八十以上米人三石有寃失職使者以聞縣

鄉即賜母贅聚

贅會也今勿
擅徵召會聚

六年六月詔曰日者有司以幣輕多姦

幣錢也輕者若一
馬直二十萬是為

幣輕而物重也農傷而未衆又禁兼并之塗故改幣以約之
去

半兩錢行五銖錢皮幣以檢約姦邪稽諸往古制宜於今廢期有月而山

澤之民未諭夫仁行而從善義立則俗易意奉憲者所

以導之未明與將百姓所安殊路而橋虔吏因乘勢以

侵蒸庶邪橋與矯同其字從手矯託也虔固也妄託上命而堅固為邪惡者也何紛然其

擾也今遣博士大等六人分循行天下存問鰥寡廢疾

無以自振業者貸與之諭三老孝悌以為民師舉獨行

之君子徵詣行在所朕嘉賢者樂知其人廣宣厥道士

有特招使者之任也

士有殊才異行當特招者任在使者分別之

詳問隱處

亡位及寃失職姦猾為害野荒治苛者舉奏郡國有所以為便者上丞相御史以聞

元鼎二年九月詔曰仁不異遠義不辭難今京師雖未為豐年山林池澤之饒與民共之今水潦移於江南迫隆冬至朕懼其饑寒不活江南之地火耕水耨方下巴蜀之粟致之江陵遣博士中中博士名也等分循行諭告所抵無令重困吏民有振救饑民免其危者具舉以聞

天漢二年秋泰山琅邪羣盜徐勃等阻山攻城

阻山者依山之

險以自固也

道路不通遣直指使者暴勝之等衣繡衣持斧

分部逐捕刺史郡守以下皆伏誅

昭帝始元元年九月遣故廷尉王平等五人

前為此官今不居者

皆謂之故也

持節行郡國舉賢良問民所疾苦寃失職者

宣帝本始元年正月遣使者持節詔郡國二千石謹牧
養民而風德化

元康四年正月遣太中大夫彊等十二人循行天下存

問鰥寡覽觀風俗察吏治得失舉茂材異倫之士

五鳳四年四月辛丑晦日有蝕之詔曰皇天見異以戒朕躬是朕之不逮吏之不稱也以前使使者問民所疾苦復遣丞相御史掾二十四人循行天下舉寃獄察擅為苛禁深刻不改者

元帝初元元年四月詔曰朕承先帝之聖緒獲奉宗廟戰戰兢兢間者地數動而未靜懼於天地之戒不知所

繇

繇與由同

方田作時朕憂蒸庶之失業臨遣光祿大夫褒

等十二人

上自臨勅
乃遣之

循行天下存問耆老鰥寡孤獨困

乏失職之民延登賢俊招顯側陋因覽風俗之化相守
二千石誠能正躬勞力宣明教化以親萬姓則六合之
內和親庶幾虛無憂矣書不云乎股肱良哉庶事康哉
布告天下使明知朕意

建昭四年夏四月詔曰朕承先帝之休烈夙夜慄慄懼
不克任間者陰陽不調五行失序百姓饑饉惟蒸庶之
失業臨遣諫大夫博士賞等二十一人循行天下存問耆

老鰥寡孤獨乏困失職之人舉茂材特立之士相將九
卿其帥意毋怠使朕獲觀教化之流焉

成帝建始三年九月詔曰迺者郡國被水災流殺人民
多至千數京師無故訛言大水至吏民驚恐奔走乘城
殆苛暴深刻之吏未息元元寃失職者衆遣諫大夫林
等循行天下

河平四年三月遣光祿大夫博士嘉等十一人行舉瀕
河之郡水所毀傷困乏不能自存者

陽朔二年秋關東大水流民欲入函谷天井壺口五阮
闕者勿苛留遣諫大夫博士分行視

鴻嘉元年春二月詔曰朕承天地獲保宗廟明有所蔽
德不能綏刑罰不中衆寃失職趨闕告訴者不絕是以
陰陽錯謬寒暑失序日月不光百姓蒙辜朕甚憫焉書

不云乎即我御事罔克者壽咎在厥躬

此尚書文侯之命篇中辭也言

我周家用事者無能有者老賢者使國危亡罪咎在其
用事者也又曰咎在厥躬平王自謂故引之以自責耳

方春生長時臨遣諫大夫理等

天子自臨
救而遣

舉三輔三河

弘農宛獄公卿大夫部刺史明申敕守相稱朕意焉

永始三年春正月己卯晦日有蝕之詔曰天災仍重朕甚懼焉惟民之失職臨遣太中大夫嘉等循行天下存問耆老民所疾苦其與部刺史舉惇樸遜讓有行義者各一人

平帝元始元年正月遣諫大夫行三輔舉籍吏民以元壽二年倉卒時橫賦斂者償其直

二年九月使謁者大司馬掾四十四人持節行邊遣執

金吾候陳茂假以鈺鼓

將帥乃有鈺鼓今茂官輕兵少又但往諭曉之耳所以假鈺鼓

者欲重其威也

四年遣大僕王暉等八人置副假節分行天下覽觀風

俗

後漢光武建武二年使太中大夫伏隆持節安輯青徐

二州招張步降之

二十九年二月遣使者舉寃獄出繫囚

安帝延光三年遣侍御史分行青冀二州灾害督錄盜

賊

順帝漢安元年八月遣侍中杜喬光祿大夫周舉守光祿大夫郭遵馮羨樂巴張綱周栩劉班等八人分行州郡班宣風化舉實減否

建康元年正月詔曰隴西漢陽張掖北地武威武都自去年九月已來地百八十震山谷坼裂壞敗城寺殺害民庶夷狄叛逆賦役重數內外怨曠惟咎歎息其遣光祿大夫案行宣暢恩澤惠此下民勿為煩擾

靈帝熹平五年四月使侍御史行詔獄亭部理冤枉原
輕繫休囚徒

獻帝初平三年四月誅董卓遣使者張种撫慰山東八
月遣太尉馬日磾及太僕趙岐持節慰撫天下

魏文帝初嗣魏王遣使者循行郡國有違理培克暴虐
者舉其罪

黃初六年遣使者循行許昌以東盡沛郡問民所疾苦
貧者賑貸之

高貴鄉公正元元年十月遣侍中持節分適四方觀風俗勞士民察冤枉失職者

晉武帝泰始二年春正月遣兼侍中侯史光等持節四方循省風俗除禳祝之不在祀典者

四年詔刺史二千石長吏曰古之王者以歲時巡狩方岳其次則二伯術職不然則行人順省故雖幽遐側微心無壅隔下情上通上指遠諭至於鰥寡罔不得所用垂風遺烈休聲猶存朕在位累載如臨深谷夙興夕惕

明發不寐坐而待旦思四方水旱灾青為之惕然勤躬
約已欲令事事當宜常恐衆吏用情誠心未著萬機兼
猥慮有不周政刑失謬而弗獲備覽百姓有過在予一
人惟歲之不易未遑卜征巡省之事下之未久其何以
恤之今使使持節侍中副給事黃門侍郎銜命四出周
行天下親見刺史二千石長吏申諭朕心訪求得失損
益諸宜觀省政教問人間患苦周典有之曰有萬姓之
利害為一書其禮俗政事刑禁之逆順為一書其暴亂

作慝犯令為一書其禮喪凶荒厄貧為一書其康樂和
親安平為一書每國辨異之以返命於王舊章前訓今
率繇之還具條奏俾朕昭然鑒於幽遠若親行焉大夫
君子其各悉乃心敬乃事嘉言令圖苦言至戒與使者
盡之無所隱諱方將虛心以俟其勉哉勗之稱朕意焉
其無忽是年又遣使者侯史光循行天下
太元七年十二月遣侍御史巡遭水諸郡

後魏道武天興元年八月遣使循行郡國舉奏守宰不

法者親覽察黜陟之

三年正月分命諸官循行州郡觀民風俗察舉不法
四年二月分命使者循行州郡聽察詞訟糾劾不法
天賜元年四月詔尚書郎中公孫表使於江南以觀桓
玄之釁也值玄敗而還

明元即位詔都兵將軍山陽侯奚斤巡行諸州問民疾
苦撫恤窮乏

永興三年春詔北新侯安同等持節巡行并定二州及

諸山居雜胡丁零問其疾苦察舉守宰不法其寃窮失職疆弱相凌孤寒不能自存者各以事聞

秦常二年春詔九州之民隔遠京邑時有壅滯守宰至不以聞今東作方興或有貧乏失農務者其遣使者巡行天下省諸州觀民俗問民疾苦守宰治行諸有不能自申皆因以聞

七年九月分遣使者循行天下州郡觀察風俗

太武太平真君元年正月分遣侍臣循行州郡觀察風

俗問民疾苦

文成太安元年六月詔曰夫為治者因宜以設官舉賢以任職故上下和平民無怨謗若官非其人姦邪在位則政教凌遲至於彫薄思明黜陟以隆治道今遣尚書穆伏真等三十人巡行州郡觀察風俗入其境農不墾殖田畝多荒則徭役不時廢於力也者老飯蔬食少壯無衣褐則聚斂煩數匱於財也閭里空虛民多流散則綏導無方疎於恩也盜賊公行劫奪不息則威禁不設

失於刑也衆謗竝興大小嗟怨善人隱伏佞邪當途則
為法混淆昏於政也諸如此比黜而戮之善於政者褒
而賞之其有阿枉不能自申聽詣使告狀使者檢治若
信清能衆所稱美誣告以求直反其罪使者受財斷
察不平聽詣公車上訴其不孝父母不順尊長為吏姦
暴及為盜賊各具以名上其容隱者以所匿之罪罪之
孝文延興二年十一月分遣使者巡省風俗問民疾苦
三年十一月詔以河南七州牧守多不奉法致新邦之民莫

能上達遣使者觀風察獄黜陟幽明

四年十一月分遣侍臣循河南七州觀察風俗撫慰初

附

太和二年八月分遣使者考察守宰問民疾苦

六年八月分遣大使巡行天下遭水之處丐民租賦貧
儉不自存者賜以粟帛

八年正月詔隴西公元琛尚書陸叡為東西二道大使

褒善罰惡

十四年二月詔遣侍臣循行州郡問民疾苦

十八年冬十月分遣侍臣巡問民所疾苦

二十一年正月己亥遣兼侍中張彞崔光兼散騎常侍
劉藻巡方省察問民疾苦黜陟守宰宣揚風化

宣武以太和二十三年四月即位六月分遣侍臣巡行
郡國問民疾苦考察守令黜陟幽明文武應求道著丘

園者皆加褒禮

又云宣武時遣使巡行四方以直閣將軍薛曇寶為持節兼散騎常侍龍驤將

軍南道

大使

景明二年正月帝始親政詔曰朕幼承寶歷艱憂在疚

庶事不親風化未洽今始覽政務義協惟新思使四方

風從率善可分遣大使黜陟幽明

是年以源懷為車騎大將軍詔為使

持節加侍中行臺巡行常燕湖三州賑給貧乏策採風俗考論殿最事之得失皆先決後聞

正始二年六月詔尚書李崇太府卿于忠散騎常侍游

肇諫議大夫鄧羨崇忠使持節并兼侍中羨兼黃門俱

為大使糾斷外州畿內其守令之徒咎失彰露者即便

施決州鎮重職聽為表聞

七月詔曰朕纂馭寶歷於今七載德澤未敷鑒燭不遠
知人之寃瘼所在猶滋而糾察之獄未暢於下賢愚靡
分皂白均貫非所以革民耳目使善惡勵心今分遣大
使省方巡檢隨其愆負與風響相符者即加糾黜以明
雷霆之威以申旄軒之舉因以觀風辨俗採訪功過褒
賞賢者糾罰淫慝理窮恤弊以稱朕心

三年四月詔遣使者巡慰北邊酋庶

孝明熙平二年正月詔遣大使巡行四方問疾苦恤孤

寡黜陟幽明又詔選曹舉用必在得才廣求栖遁共康
治道州鎮城隍各令嚴固齋會聚集糾執妖誼圖圉皆
令造屋桎梏務在輕小工巧浮迸不得隱藏絹布繒綵
長短合式偷竊軍階亦悉沙汰籍貫不實普使糾案聽
自歸首逋違加罪

冬十月庚寅遣尚書長孫稚兼尚書鄧羨元纂等巡撫
百姓

正光元年四月詔尚書長孫稚巡撫北藩觀察風俗

孝昌元年徐州刺史元法僧以城叛入梁梁遣蕭綜來
據彭城時遣大都督安豐王延明督臨淮王或討之盤
桓不進乃詔尚書三公郎兼司州別駕前軍將軍辛雄副
太常少卿元晦為使給齊庫刀持節乘驛催軍有違即
令斬決肅宗謂雄曰誨朕家諸子標以親懿籌策機計
仗卿取勝耳到軍勒令竝進徐州綜送降款
孝昌末魏蘭根為光祿大夫河北流人南度以蘭根兼
尚書使齊濟青兗四州安撫置縣郡

孝莊建義元年五月以尚書右僕射元羅為東道大使征東將軍光祿勳元欣副之巡方黜陟先行後聞

後周閔帝元年正月即天王位詔曰上天有命革魏於周致予一人受茲大號予惟古先聖王罔弗先於省視風俗以求民瘼然後克治矧予眇眇又當草昧若弗尚於達四聰明四目之訓者其有聞知哉有司宜分命方別之使所在巡撫五教何者不宣時政有何不得無修身潔己才堪佐世之人而不為上所知冤枉受罰幽

辱於下之徒而不為上所理孝義貞節不為有司所申
鰥寡孤獨不為有司所恤暨黎庶衣食豐約賦役繁省
灾癘所興水旱之處竝宜具聞若有年八十已上所在就
加禮餼

明帝元年六月遣使分行州郡理囚徒察風俗掩骸埋胔
武成二年二月以車騎大將軍儀同三司冀擣為大使
巡歷州郡察風俗理冤滯還拜小御

武帝保定元年二月遣大使巡察天下

五年七月遣大使巡察天下

天和五年四月遣大使巡察天下

建德五年正月詔曰朕克已思治而風化未弘永言
前古載懷夕惕可分遣大使周省四方察訟聽謠問民
恤隱其獄犴無章侵漁黎庶隨事究驗條錄以聞若政
績有施治綱克舉及行宣圭華道著丘園竝須檢審依
名騰奏其鰥寡孤獨實可哀矜亦宜賑給務使周贍
六年平齊詔曰東夏既平王道初被齊氏弊政餘風未

矜朕劬勞萬幾念存康濟恐清淨之志未形四海下民
疾苦不能上達寢興軫慮用切于懷宜分遣使人循方
慰撫觀風省俗宣揚治道有司明立條科務在弘益
宣帝即位遣大使巡察諸州

隋高祖開皇元年即位遣八使巡省風俗

三年十一月發使巡省風俗詔曰朕君臨區宇深思治
術欲使生人從化以德代刑求草萊之善旌閭里之行
民間情偽咸欲備聞已詔使人所在賑恤揚鑣分路將

遍四海必令為朕耳目如有文武才用未為時知宜以禮發遣朕將銓擢其有志節高妙越等超倫亦仰使人就加旌異令一行一善獎勸於人遠近官司遐邇風俗巨細必紀還日奏聞庶使不出戶庭坐知萬里

四年八月甲午遣十使巡省天下

六年正月遣民部尚書蘇威巡省山東

十年八月遣柱國襄陽郡公韋洸上開府東萊郡公王景竝持節巡撫嶺南百越皆服

十五年七月遣邳國公蘇威巡省江南

十七年三月遣治書侍御史柳彧皇甫誕巡省河南河北

仁壽元年遣十六使巡省風俗

煬帝大業元年正月發八使巡省風俗下詔曰昔者哲王之治天下也其在愛民乎既富而教家給人足故能風淳俗厚遠至邇安治定功成率繇斯道朕嗣膺寶歷撫育黎獻夙夜戰兢若臨川谷雖則聿遵先緒弗敢失

隆永言政術多有缺然况以四海之遠兆民之衆未獲親臨問其疾苦每慮幽仄莫舉冤屈不申一物失所乃傷和氣萬方有罪責在朕躬所以寤寐增歎而夕惕載懷者也今既布政惟始宜存寬大可分遣使人巡省方俗宣揚風化薦拔淹滯申達幽枉孝悌力田給以優復鰥寡孤獨不能自存者量加賑濟義夫節婦旌表門閭高年之老加其版授竝依別條賜以粟帛篤疾之徒給侍丁者雖有侍養之名曾無調贍之實明加檢校使得

存養若有名行顯著操履修潔及學業才能一藝可取
咸宜訪採將身入朝所在州縣以禮發遣其有蠹政害
民不便於時者使還之日具錄奏聞

二年遣十使併省州縣

唐高祖武德元年六月遣太僕卿宇文文明達招慰山東
之地

七月遣黃臺公瑗安撫山南之地

十月詔曰隋德下衰政荒民散九州輻裂四海瓜分元

元無辜飼豺狼之吻慄慄黔首罹兵革之災朕祇膺寶
圖救其危墜一物失所情深納隍今趙魏之人俱承大
化海岱之境思稟朝章然而尚迫寇戎受拘凶暴經途
遐阻末由自達宣風布教必佇循良柔服招攜事資明
恕右翊衛大將軍上柱國淮安王神通地惟近屬功參
運始仗節建旗允當重寄可山東道安撫大使其山東
諸軍事並受節度

二年閏二月詔曰隋末道消運為陽九盜賊蜂起饑饉

薦臻四海之民墜於塗炭是以上天降鑒爰命朕躬綏
靜黎元克定凶醜府庫倉廩所在開發流冗之民隨加
鎮撫言念亭育監寐匪忘然年穀不登民多困乏一物
失所有甚納隍宜加存問救其疾苦可令皇太子建成
巡京城側近諸縣秦王巡京城以東右僕射裴寂巡京
城以西詣彼閭閻見其耆老觀省風俗庶察吏民乏絕
之徒量加賑給如有冤滯竝為申理高年疾病就致束
帛是月遣馬邑都城李靖前鹿城縣令元無竭慰撫嶺

南

四月遣大理卿郎楚之安撫山東夏侯端安撫淮左奏
九韶樂設宴而遣之

五月遣黃門侍郎楊恭仁安撫河西之地

三年二月詔曰朕承天明命撫育萬方康俗濟民無忘
監寐西蜀僻遠控接巴夷厥土沃饒山川遐曠往者隋
末喪亂盜寇交侵流寓之民遂相雜撓游手墮業其類
實煩奪攘矯虔因此而作王業伊始務從草創牧宰庶

寮隨事遷易州縣分析權宜廢置然而王道未洽民瘼
猶存靜言思之夙興軫念澄源正本義在更張可令秦
州總管鄰國公軌御史大夫滑國公無逸為益州道安
撫大使宣揚朝典進擢廉平貶黜苛暴申理冤滯孝悌
貞節表其門閭鰥寡孤獨量加贍恤事有便宜竝委處
分
四年六月既征王世充遣驍衛將軍盛彥師安撫河南
之地

九年七月遣諫議大夫魏徵宣慰山東

太宗貞觀三年五月旱六月令中書舍人杜正倫崔敦禮守給事中尹文憲張玄素等往關內諸州分道撫慰問人疾苦見禁囚徒量事斷決人有冤枉不能自申者隨狀理之事有不便於人及官人貪殘為患者並具狀還日以聞困窮之徒比雖賑贍仍有乏絕者亦量加支給在京見禁囚徒亦令所司量事斷決務從寬簡稱朕意焉

六年三月幸九成宮發使存問高年鰥寡

七年七月遣大理少卿李弘節太子中允張玄素都水使者長孫師巡撫嶺南

八年正月詔曰昔者明王之御天下也內列公卿允釐庶績外建侯伯司牧黎元唯懼淳化未敷名教或替故有巡狩之典黜陟幽明行人之官存省方俗用能遐邇遂性情偽無遺時雍之宜率繇茲道朕祇膺寶命臨御帝圖稟過庭之義方荷上玄之嘉祉四荒八表無思不

服而夙興夕惕勤躬約已日慎一日雖休勿休欲萬國
歡心兆民有賴推誠待物近取諸身實謂羣官受拜咸
能自勵乃聞連帥刺舉或乖共理之寄縣司主吏甚多
黷貨之罪有一於此責在朕躬是用終夜愴然景輟
食宜遣大使分行四方申諭朕心延問疾苦觀風俗之
得失察政刑之苛弊耆年舊齒孝悌力田義夫節婦之
家疾廢惇嫠之室須有旌賞賑贍聽以倉庫物賜之若
有鴻材異學留滯未班哲人奇士隱倫屠釣宜精加搜

訪進以殊禮務盡使乎之旨俾若朕親覲焉於是分遣
蕭瑀李靖楊恭仁王珪竇靜李大亮劉德威皇甫無逸
韋挺李襲譽張亮杜正倫趙弘智等巡省天下

十八年十一月庚辰遣使齎璽書詣鄭汝懷澤四州巡
問高年宴賜各有差

二十年正月丁丑遣大理卿孫伏伽黃門侍郎褚遂良
尚書左丞楊纂太子詹事張行成太僕少卿蕭銑光祿
少卿馮怱司農卿達奚懷義雍州司馬李督春給事中

張獻冊御史中丞唐臨中書舍人崔仁師柳奭太子中
允宇文節太子中舍人賀拔玄壹萬年縣令宋行質長
安縣令李乾祐戶部郎中劉翁勃刑部侍郎劉燕客王
昕尚藥奉御長孫知人大理正郭文宗李鏡玄等以六
條巡察四方各以澄清為務多所貶黜舉奏及使者還
詣闕稱寃者前後相屬因令褚遂良以其類具狀以聞
帝親自臨決牧宰已下以能官進擢者二十人以罪死
者七人其流罪以下及免黜者數百十人八月幸靈州

所經州縣竝遣使存問老疾并加賑恤九月遣霍王府
長史段寶玄滄州別駕張開諒同州別駕張文會等三
道使巡察嶺南諸州

二十二年六月令陝州刺史孫伏伽於河南太子詹事
張行成於河北渭州親見父老存撫百姓從軍之家州
縣為之營農

三十三年八月以晉州地震令尚書郎中一人克使存
問舍宅損壞者給復一年

高宗永徽四年十月甲辰遣使存問鰥寡惇獨不能自存者

五年正月詔工部侍郎王儼往河北簡行遭水諸州乏絕者賑貸之仍慮囚徒

顯慶元年正月令宗正卿隴西郡王博文刑部尚書長孫祥大理卿段寶玄於畿內諸州巡撫百姓給貸乏絕二年十月幸許州遣少府少監鄭欽泰等分往許汝州及所經縣省錄囚徒并搜訪孝義及經學之士

龍朔元年十二月戊寅詔諸州霜旱蟲澇之處分道遣使存問賑給并慮囚徒

三年八月詔分遣大使巡察問人疾苦黜陟官吏

乾封二年十月遣守大司憲樂彥瑋司平少常伯皇甫公議太子左中護楊思敬兼西臺舍人李虔澤等分往長安萬年城外諸縣巡問百姓親檢校田苗賑給乏絕
總章二年四月令左肅機兼檢校沛王府長史皇甫公議往慮岐州諸縣囚徒量事原免之

三年二月遣使存問諸州逐糧百姓漸令復業仍令州縣檢校優恤之其未情願歸者聽之

咸亨二年十一月幸許汝等州分遣通事舍人員外郎御史存問所經州縣老疾及鰥寡慄獨仍復見禁囚徒等儀鳳二年十二月詔黃門侍郎同中書門下三品來嘗為河南道大使中書侍郎同中書門下三品薛元超為河北道大使尚書左丞崔知悌國子司業鄭祖玄為河南道大使分道巡撫申理冤屈賑貸乏絕



冊府元龜卷一百六十一

欽定四庫全書

冊府元龜卷一百六十二 宋 王欽若等 撰

帝王部

命使第二

唐中宗神龍二年二月遣十使巡察風俗下制曰古之御天下者以大寶為公器以崇高為外物仰則乾行順性命之理俛思坤載成博厚之德將以財成至道保邦靜人用清三微

臣欽若等曰三微者天地人三正之始萬物皆微故王者法焉

以齊七

政能臻夫此者豈一人之力哉實賴羣方共康庶績自
季葉淪替涵棄公道官匪其人教無所習懷才修潔者
則依違以自容通方宏偉者則放蕩以求利繇是淳化
日消澆風歲長典章訛弊眩俗凋殘逶迤陵頽莫能振
理朕以薄德丕承寶命夙夜惟寅憂勞無怠昧且端冕
心被寰瀛日晏罷朝念周黎庶頃者勵精推擇傍求牧
宰冀聞善政惠康乃又虛已勵勤美化猶怠貪官傲吏
屢黷於爰書失職流亡幾淪於板籍豈刑賞之柄不協

其中將仁恩之誠未孚於下永言國本良深軫悼古者
天子巡狩省方觀俗而錫鑿備駕或以為煩故分命韜
軒博採諛頌將以彰善癉惡激濁揚清散皇明以燭幽
揚仁風以被物實資令德允屬通才惟懷永圖式鑒成
憲宜於左右臺及內外五品以上官識理通明立性堅
白無所詘撓志在澄清者二十人分為十道巡察使二
周年一替以廉案州部俾其董政郡吏觀撫兆人議獄
緩刑扶危拯滯若能抗詞直筆不憚權豪仁恕為懷黜

陟咸當別加獎擢優以名器如脂韋苟全蘧蔭咸施高
下在心顧望依附者將遷削屏棄肅以憲章咸竭廼心
以副朕意遂命易州刺史姜師度攝右御史以充此使
景龍三年八月遣十使巡察天下

睿宗唐隆元年六月庚子平韋庶人壬寅降十道使齋
鹽書宣撫

景雲元年八月制出十道使持節巡撫天下

二年二月降十道使按察

七月分遣都督刺史十道按察

十一月出十道使巡撫

太極元年二月出十道使巡撫

玄宗先天元年太上皇詔曰朕恭己無為留神玄默俯
順厯數僉謀公卿式命元子祗膺寶位今庶政迫新光
華肇啟但恐天下至廣未達朕心故臨遣使臣宣揚朝
典宜以膳部郎中蕭瑗為河南道宣勞使諫議大夫楊
虛受為河北道宣勞使贊善大夫薛植為淮南道宣勞

使殿中丞薛麟為隴右道宣勞使宗正卿姜晞為河東道宣勞使司門郎中李誠為關內道宣勞使工部郎中高紹為劔南道宣勞使太子右諭德蕭憲為山南道宣勞使宋王府司馬裴綱為江南道宣勞使諫議大夫甯悌原為嶺南道宣勞使

二年七月壬申命益州長史畢構宣撫劔南及山南道少府監齊景胄宣撫關內及河東道太子右庶子陸餘慶宣撫河北道宗正少卿韋瑋宣撫江南及淮南道光

祿少卿杜元暹宣撫隴右道廣州都督周利貞宣撫嶺南道制曰昔者明王之御天下也內有公卿允釐庶績外有方伯司牧羣黎猶懼至道未孚淳風或替故有巡狩之典黜幽陟明行人之官省方察俗用能遐邇咸乂情偽無遺於變時雍率其道也朕祇膺嗣德恭守帝圖上稟過庭之謨下憑衆庶之立竭精思理兩載于茲興逮小康漸躋至化而區宇遐曠風教未同負扆長懷責深在已近者姦回構釁竊起蕭牆宗社降靈應時殲殄

今又恭承聖訓總統大猷率彼百官齊茲七政恐倉廩不實禮節未興吏靡息於貪殘人或滯於幽枉永言於此明發疚懷今卜征未習時邁仍遠宜分命輶軒慰撫黎庶畢搆等竝操履公清識見明允茂績彰於歷試嘉譽沛於周行宜膺行李載光原隰所至之處申諭朕心竝令屏絕浮華敦崇仁厚務修孝悌勤事農桑耆老鰥惇征人家口不自存者咸加恤問德舉言揚唯賢是急若有良材異行藏器下僚括人奇士隱淪屠釣審知才

行灼然者各以名聞凡百牧宰洎乎吏人咸悉朕心各敬迺事勤則不匱仁遠乎哉勉矣勗之以副朕心

開元二年四月己巳勅曰淮海維揚是稱谿險山川重復水陸殷湊去歲田收稍乖豐稔今茲人庶頗致饑乏朕為之父母深用惕然近聞雨澤應節秔稻有望目前之困餬口猶切思從蠲省用救荒弊宜令給事中楊虛受往江東道安撫存問觀察疾苦詳理寃滯百姓間有偉才異行藏鱗戢羽隱淪屠博栖遲閭閻官人內有貪

冒苟得背公徇私或修己自守養望克位者還日各以名聞所至之州具令宣布求瘼恤隱稱朕意焉

五年二月詔曰伊昔明王奉若天道所寶惟穀所仗惟賢故能務穡勸農興利除害朕以薄德纂承洪緒政期克已誠不動天頃歲河南河北諸州蝗蟲為患雖當道遣使除瘞恐今又生育天戒若此朕甚懼焉罪實在予殃豈移歲且牧宰之任朝廷所委苟得良才式敷惠訓古有壽張飛逝中牟不入者斯其效也刺史縣令等當

各竭乃心用攘厥患方考休咎大明黜陟惟爾凡百可不勉哉宜令戶部郎中蔡容往河北道侍御史崔喬往河南道觀察風俗問利害便與州縣籌度隨事處置還日奏聞

六年八月辛巳詔曰朕自臨御天下介于人上萬邦在念百姓為心慎日以兢因時載惕眷茲茂育寧忘監寐今歲河南諸州頗多水潦稼穡不稔閭閻阻饑方屬西巡更深東顧不加存問孰副憂軫宜令工部尚書劉知

柔馳驛充使往河南道巡歷簡問應免租庸及賑恤竝
量事便處分兼察人民冤苦官吏善惡還日奏聞宋毫
陳許之間遭澇尤甚其應緣賑恤宜倍優賞

八年五月置十道按察使八月以御史大夫王峻充關
內道按察使揚州長史王怡充淮南道按察使右庶子
齊澣充河南道按察使少府監楊孚充劔南道按察使
秦州都督張守潔充隴右道按察使荊州長史盧逸充
山南道按察使鴻臚少卿蕭嵩充河南道按察使襄州

刺史裴觀為梁州都督山南道按察使潤州刺史趙升
卿充江南東道按察使宣州刺史霍廷玉充淮南西道
按察使仍下制曰苛慝不作民斯無怨寬猛相濟政是
以和故周禮以官刑糾邦理以官敘正羣吏允迪前烈
式惟舊章且夫寰宇至大不可以周覽黎甿至殷不可
以獨化熙我庶政實惟舊察苟非其才固以親理朕惟
是夙夜不遑安寧開元之初分遣案部糾擿姦犯頗聞
懲息以其辜久則煩尋亦從其停廢繇以歲月寢成寬

弛今聞在外官察多違憲法牧守則寄任茲重令長則
祿秩且優亟聞侵竊屢有章奏雖賜金為惠未愧張武
之心還珠表德罕見孟嘗之政豈敦諭之意未孚於就
列將貞高之節有謝於前修永懷於此良用沉歎且政
寬而慢法弊則通弛而張之其可致理御史大夫王駿
等竝識通政要位以才達茂其聲實弘此憲章宜分遣
巡案以時糾察巡內有長吏貪擾獄訟寃滯暗懦尸祿
苛虐在官即宜隨事案舉所犯狀竝推勘准格斷覆訖

奏聞仍便覆囚夫牧宰之職教導是先錄曹之任紀綱
斯在其有政理殊尤清直獨立者咸以名薦餘官有清
白者稱及諸色不善各別為科目同狀奏聞其尋常平
狀竝不須通俾夫善取其尤罰無所濫疎而不漏察而
不苛必將正其源流宏彼綱目不可總此煩碎擾其吏
人應是州縣常務事非損益者使人更不必干預其百
姓有不支濟應須處置事狀不便於釐革者與州縣商
量處分訖奏聞以副虛佇之心以光澄清之舉

九年八月詔曰朕身居九重心在萬姓恐情未達下政
或乖方頃者故命近臣分道巡撫為屬農月且停使車
今秋稼方收時亦將隙命中書舍人何鸞等宜所到之
處宣慰百姓令悉朕懷其有水旱之州或須貸給不可
遠更奏聞宜便量事處置征鎮之家各令州縣檢校優
賞其中無兼丁存濟者仍加賑恤

十一年五月命左拾遺徐楚璧大理丞王琇大理評事
宋詞班景倩河南府法曹參軍元將茂大原府司錄叅

軍張珣大原府兵曹叅軍宋希玉長安縣主簿韋利涉
長安縣尉王冰雒陽主簿劉日正長安縣尉裴寬萬年
縣尉崔希逸三原縣尉喬夢松告成縣尉徐鶚汜水縣
尉薛侃同州司法叅軍邊冲寂分州錄事叅軍韋洽榆
次縣尉郭庭等攝監察御史分巡諸道詔曰國之三典
令于四方歲終則巡聽其獄訟頃因水旱貨食不足或
徭稅徵逸多不折衷或租調蠲除事涉欺隱皆吏之不
稱政之不修是用命茲使臣委其詳覆徐楚璧等竝清

白自立茂有政聲必使事合權宜刑無寃濫不損於物
有益於公往敷厥休副茲推擇竝可攝監察御史勾當
租庸地稅兼覆囚

十三年正月制天下見禁囚徒死罪降至流流已下悉
原之都城內委中書門下當日疏決處分京城委劉守
制到日處分仍令中丞蔣欽緒往河南大理少卿明珪
往關內刑部郎中張樽往河東兵部郎中崔珣往山南
東道右庶子高仲舒往江西道職方郎鄭績之往劍南

道秘書丞張履冰往淮南道殿中侍御史孫濟往隴右
道贊善大夫張景幽往河西道右諭德李林甫往山南
西道主客郎中張烈往江南東道竝即馳驛發遣所至
之處疏決囚徒宣慰百姓其有窮乏者不自存濟及侍
老征人之家有疾苦者各令州縣量加醫療及賑恤其
嶺南五府磧西四鎮非流配効力等見禁囚徒各委節
度使及本管都督府處分布告遐邇知朕意焉

十四年七月詔曰朕撫有天下寅畏上玄思保太和用

康庶類頃秋夏之際水潦不時懷鄭許滑衛等州皆遭
泛溢苗稼潦漬屋宇傾摧有切納隍之憂良深在予之
責宜令右監門衛將軍知內侍省事黎敬仁速往宣慰
如有遭損之處應須營助賑給竝委使與州縣相知量
事處置及所在堤堰不穩便者簡行具利害奏聞

九月詔曰頃秋夏之間水潦方降閭閻損壞稼穡漂淪
常恐一物之違況乃數州之弊故發中使循于外臺章
奏屢聞州鄉稍輯朕視之如子若納諸隍于再于三情

猶馭朽審求人瘼更遣信臣中丞兼戶部侍中宇文融
忠義竭誠夙夜匪懈當安人之任有利簡之能眷彼使
乎宜膺其選可往河南河北道遭水諸州宣撫仍審察
有不支濟者宜更量加賑貸若屋宇損壞牛畜俱盡及
征人之家不能自存立者量事助其脩葺其有官吏縱
捨賑給不均亦須糾正回日奏聞

十五年三月制曰河北遭水處城旁及諸蕃殺降人先
令安置及編州縣被差征行人家口等去年水澇漂損

田苗頻遣使人所在巡撫兼令州縣倍加矜恤不知竝
得安存否以今舊穀既沒新麥未登丁壯既差遠行老
少慮不支濟朕居黃屋念在蒼生每思優養無忘鑿寤
今故遣中使左監門衛將軍李善才重此宣慰宜令州
縣即時簡責有乏絕者准例給糧俾令安堵以副朕心
七月詔曰同州鄜州近屬霖雨稍多水潦為害念彼黎
人載懷憂惕宜令侍御史劉彥回乘傳宣慰其有百姓
屋宇田苗被漂損者量事賑恤

八月制曰河北州縣水災尤甚言念蒸人何以自給朕當宁興想有勞旰昃在予之責用軫于懷宜令所司量支東都租米二十萬石賑給乃令魏州刺史宇文融充宣撫使便巡撫水損應須憂恤及合折免并存閭舍一事已上與州縣相知逐穩便處置務從簡易勿致勞擾十六年九月詔曰河南道宋亳許仙徐鄆濮兗州奏早損田宜令右監門衛大將軍黎敬仁往彼巡問如有不支濟戶應須賑恤與州縣長官相知量事處置訖回日

具狀奏聞

二十一年二月以檢校尚書右丞相皇甫翼充河南淮南道宣慰使檢校尚書吏部侍郎劉彤充江東江西道宣慰使尚書兵部侍郎李鎮充山南道宣慰使制曰去年江南淮南有微遭旱處河南數州亦有水損百姓等皇甫翼等咸謂能賢式將朕命其間之絕應須賑貸便量事處置回日奏聞

四月以久旱命太子少保陸象先戶部尚書杜暹等七

人往諸道宣慰賑給及令黜陟官吏疎決囚徒

二十三年二月壬寅詔曰秦州地震謫見后上朕每克念何以臻茲仲尼有云丘禱久矣而精意以告或通神明徐國公蕭嵩地在輔弼朝之端右欲重將命暫為此行宜往秦州致祭山川凡緣所損百姓間事皆委嵩隨事處置回日以聞

辛亥初置十道採訪處置使命御史中丞盧絢為都畿採訪使御史中丞裴曠為京畿採訪使國子祭酒汴州

刺史嗣魯王道堅為河南道採訪使華州刺史李尚隱
為關內道採訪使太原尹崔隱甫為河東道採訪使禮
部侍郎兼魏州刺史宋瑤為河北道採訪使太常卿廣
州事嶺南經畧使李朝隱為嶺南道採訪使揚州長史
韋虛心為淮南採訪使太僕卿兼判涼州都督持節河
西節度等副大使牛仙客為河西道採訪使益州長史
持節劍南節度副大使王昱為劍南道採訪使荊州長
史韓朝宗為山南道採訪使潤州刺史劉日正為江南

道採訪使秦州刺史裴敦復為隴右道採訪使梁州刺
史宋詢為山南西道採訪使宣州刺史班景倩為江南
道採訪使詔曰言念蒼生心必徧於天下自古良牧福
猶潤於京師所以歷選列城聿求連率豈徒刺察將委
輯寧朝散大夫檢校御史中丞關內宣諭賑給使上柱
國盧絢等任寄已深聲實兼茂咸貫通於理道益純固
於公心或華髮不衰或白珪無玷可以軌儀郡國康濟
黎元間歲已來數州失稔頗致流冗能勿軫懷而吏或

不畏不仁或不安不便誠須矯過必任仗賢而前此使
輦下無殷鑒事皆制時務欲總權小有舉於毫髮大莫
振於綱領本命條舉却用煩苛永言所期豈云自弊今
既各膺重寄允於通才以蠲疾苦之源當協大中之義
若今行一道利及萬人朕所設官以俟能者朝之優秩
上歸令譽言可復也宜副朕懷

十一月詔令給事中韋常巡關內道中書舍人李彭年
巡河南道竝與本道採訪使及所繇長官商量回日奏

聞

二十九年五月命大理卿崔翹尚書右丞席豫工部侍郎郭虛已御史中丞張倚中書舍人孫逖給事中趙安貞太常卿韋常班景倩分行天下詔曰三載考績以鑒吏能八使觀風因求民瘼茲事體大致理之繇朕受命昊穹臨御寰夏慮乎一物有所不安偏於萬方無忘軫念而宇宙之內官吏至多倘有政失其宜即萬人受弊崔翹等或文學有稱或貞白流譽通於理道勵是公心

俾爾澄清或當委寄至於陟黜之道國之所務苟有不
當將何勸人頃年使例皆通狀其盡善者多有請求為
選調之資不善者以煩碎見輕貴奏課之數若此銜命
豈副虛懷卿等所到之州宜具宣朕意其百姓間事或
有須釐革者宜與所繇長官商量處置回日奏聞其官
吏中有貪冒贓私其犯名教或衰老疾病無政理者刺
史已下宜停務奏聞其守職公清為政尤異事堪激勸
遠近知者具以名聞其諸道有遭損下人應須賑給先

頻有處分猶慮艱弊豈忘矜恤亦宜審與州縣商量務令周濟又聞河堤穿決致有漂流諒繇州縣寬疎不時修塞亦便簡行處置勿使更然其天下道學固已有置者并鄉學等此竝切於生人比來興置蓋為教導各宜敦勸使有成益其征鎮之間或有單貧老弱不自存濟者宜令所繇倍加優賞其浮寄逃戶等亦頻處分頃來招携未有長策又江淮之間有深居山洞多不屬州縣自謂莫徭何得因循致使如此竝與州縣商量處置一

時錄奏卿等既當巡接受委非輕是宜勉爾良圖以副
朝選無或致有迴避不竭公忠朕之責成深宜自効
天寶五載正月命禮部尚書席豫御史中丞王鉉蕭隱
之諫議大夫韋見素李麟尚書左丞崔翹鴻臚少卿源
光譽分道巡按天下風俗及黜陟官吏詔曰黜幽陟明
所以察風俗求瘼恤隱所以慰黎庶不有其人孰可將
命禮部尚書席豫等亮直清節其經通大才多識前言
往行時政或久應任使嘗參八政之列或夙蘊忠公必

副四方之委永懷兆庶用寄澄清豫巡河北道鉞巡京畿關內及河東道隱之巡東畿及河南道見素巡山南東道江南西道黔中嶺南等道麟巡河西隴西磧西等道翹巡劔南及山南西道光譽巡淮南及江南東道其百姓之間及官吏之輩如事或未該須有釐革者仍委量事處置回日奏聞其嶺南黔中磧西途路遙遠若使臣一一自到慮有稽遲任各精擇判官准舊例分往十四載三月給事中裴士淹禮部侍郎楊浚太常少卿

姚子彥往河南河北江淮宣慰

肅宗至德二年十二月大赦令中書門下檢使即分道
宣慰所至郡縣審問百姓間有利害有須釐革處置者
一一奏聞

代宗廣德二年三月庚戌詔曰歲之不易征賦繁興河
南蕭然江外尤劇供上都之國用給諸道之軍頒庶務
徵求未遑小息火耕水耨夏葛冬裘充饋運而屢空支
戎衣而不足農人少而轉困編戶流而罕歸自北之化

未淳大東之詞方切君為心也朕甚痛然今區宇漸寧
凋殘已甚惕然恭已姑務息人懼惇廢之無告思省方
以親問時邁未可日昃增勞載懷鴻鴈之詩用解吾人
之恤必資循行悉以周爰皇皇者華申諭朕志宜令太
子賓客兼御史大夫劉晏往諸道宣慰應百姓有徵科
煩重人戶逃亡及水旱所損不能支濟者竝與本道節
度使計會蠲削安存遂便處置訖具狀聞奏官吏之政
在邦必聞知無不為公道斯在其租庸使及刺史縣令

錄事參軍有精於政理及賦役均平州縣之間稱為良
吏者具名奏聞別有甄異如或殘忍慢法貪污敗官有
害於人不應時務者亦具狀以聞仍與本道觀察節度
使會計舉按四海至廣九重至深思使下情上通常令
上旨下達務以審慎稱朕意焉

大曆二年八月以潭衡水灾命給事中賀若察使於湖
南宣慰

九月命比部員外郎莫藏用使於嶺南宣慰

十二年八月以京畿水旱分命御史巡苗

德宗即位初湖南山洞中王國良者聚眾為盜都官員外郎闕播往宣慰之臨行召對於別殿播奏曰臣自今奉詔撫國良如不受命臣請便宣恩命詰鄰州速出兵翦除帝曰卿言深合朕意

建中元年二月發黜陟使分往天下以右司郎中兼侍御史庾何巡京畿職方郎中劉灣往關內刑部員外郎裴伯言往河東澤潞磁邢等道司勳郎中韋禎往山南

西道劔南東西川禮部郎中趙贊往山東荆南黔中湖南等道諫議大夫吳經綸往魏博成德幽州等道給事中盧翰往河南淄青東都畿等道吏部郎中李承往淮西淮南等道諫議大夫柳載往浙江東西道刑部郎中鄭叔則往江南江西福建等道禮部員外衛晏往嶺南五管詔曰朕聞唐虞聖人之理三載考績黜陟幽明兩漢施教之君亦命八使澄清天下朕纂承大業思服訓謩雖王公卿士內勤夙夜藩岳守將外盡公忠而兵革

未寧戎狄未盡紀綱未振法令未敷封圻郡縣賦稅不
一師旅上下勞逸不均所以終宵積憂寤寐增惕爰命
羣士往代予言行乎四方以聽于理舉其百事以歸于
正朕之深顧可不勤副也

興元元年正月帝在奉天詔曰古者天子有巡狩之義
以考國典以觀人風在時多虞良或未暇乃命卿士使
于四方問人疾苦庶吏善惡苟副所任則如親臨在理
平之時尚資勤恤况流散之後得無省憂朕以不敏不

明肆于人上撫育失道誠信未孚寇盜繁興阻兵拒命
哀我臣庶陷于匪人顧茲田疇鞠為茂草不念柔服遂
命徂征徵發甲兵暴露營壘冒干鋒刃繼以死傷農工
廢棄其生業商賈咨嗟於道路軍戎日益閭巷日空凋
瘵愈窮費用愈衆以財力之有限供求取之無涯怨氣
上騰咎徵斯應疫厲薦至水旱相乘人罹于灾誰任其
責朕自嗣位殆今六年連兵不解已逾四稔雖本非獲
已義在濟人而事有重勞良深罪已皆以朕之寡昧居

安忘危致寇之繇實在於此予則不德人亦何辜媿恨
積哀痛心疾首昨者改元施令悔往布新將使反側獲
安干戈自息猶懼思慮不周於庶務誠感未達於遐方
一理失中一夫不獲則何以謝天譴致人和俾代予言
其在良弼宜令門下侍郎平章事蕭復充山南東西荆
湖淮南江西鄂岳浙江東西福建嶺南等道宣慰安撫
使嗚呼往率乃職敬敷朕命慰勉征戍勞來困窮訪其
所安察其所弊滯淹必達冤濫必申無憚幽遠而不備

無畧細微而不恤其諸道將士准前制嚴備疆界勿使
侵擾仍各令本御史具名銜聞奏悉與甄敘殊功勁節
別條狀迹當特優獎百姓兩稅外徵率一切竝停諸道
事緣急切交須處分即與長史商度務合便宜其餘利
害竝還日條奏朕當詳察以擇厥中宣布遠近咸令知
悉

是月給事中杜黃裳兼御史中丞江淮宣慰使

十月辛丑詔工部尚書賈耽往河陽魏博道宣慰兵部

侍郎李紆往河東宣慰

十一月丁丑以秘書監崔漢衡為兵部尚書東都河陽魏博宋亳淄青賑給宣慰使工部侍郎劉太真為河東澤潞鎮冀易定賑給宣慰使

貞元元年二月遣工部尚書賈耽工部侍郎劉太真宣

慰於東都河南

是時東都米每斗值一千錢飢饉塞道前年蝗虫大起自山而東竟于海浮天

被野草木無遺河北諸州米斗值錢九百餓死者廐道路

八年八月詔曰朕以薄德託於人上勵精庶政思致雍

熙而誠不動天政或多闕陰氣作沴暴雨薦臻自江淮而及於荆襄歷陳宋而施於河朔其間郡邑連有水灾城郭多傷公私為害損壞廬舍浸敗田苗或親戚漂淪或資產沉溺為之父母所不忍聞興言疾疚良深惻憫夙夜祇畏悼于厥心是用寢不獲安食而忘味時且賑恤庶洽幽明宜令中書舍人奚陟往江陵襄郢隨鄂申光蔡等州左庶子姚齊梧往陳許宋亳徐泗等州秘書少監雷咸往鎮冀德棣深趙等州京兆少尹韋武往揚

楚廬壽徐潤蘇常湖等州宣撫應諸州百姓因水不能
自存者委宣撫使賑給死者各加賜物所在官為斂收
埋瘞其田苗所損委宣撫使與所在長吏具奏於戲一
夫不獲一物失所刑法不中賦斂不均皆可以失陰陽
之和致水旱之沴其繫囚及獄訟久未決者委所在長
吏即與疎辨務從寬簡俾伸冤滯貪官暴吏倚法害公
特加懲肅用明典憲災傷之後切在撫綏咨爾方鎮之
臣洎于守宰咸宜悉乃心力以恤凶災宣布朕懷使各

知悉是秋河南河北山南江淮凡四十餘州大水漂溺死者二萬餘人帝召見奚陟等於延英殿臨遣

憲宗以永貞元年八月即位詔曰理天下者先脩其國國命之重寄在方鎮方鎮共理實惟列城列城為政繫乎屬縣然則匹夫之耕匹婦之織積微成著以供國計永念蒸庶厥惟艱哉頃年以江淮租賦爰及權稅委在藩服使其平均太上皇君臨之初務從省便遂令使府歸在中朝或恐巡院既多職因交替新制未立舊綱已

紊况河汴而東瀕海之右名都奧壤疆理接連如或征
賦不均徵輸難濟物輕貨重法弊人勞又聞江淮數道
比愆時雨深憂黎庶之不足軍國之闕供政有所不宣
事有所未便牧宰有課績官吏有否減爰遣使臣申我
休命宜令度支及諸道鹽鐵轉運副使戶部侍郎兼御
史大夫潘孟陽專往宣諭慰安疲屯詢訪便宜蠲除疾
苦安人利國稱朕意焉

元和四年正月以灾旱命左司郎中鄭敬使淮南宣歙

吏部郎中崔芄使浙西浙東司封郎中孟簡使山南東

道荆南京兆少尹裴武使江西鄂岳等道宣撫

帝召對告之曰

卿等賑恤災旱當勤於奉職勿如潘孟陽所到務飲酒游山寺而已仍許卿等以便宜從事

穆宗長慶元年八月丁亥以殿中侍御史溫造為起居舍人充鎮州四面諸軍宣慰使造前以京兆府司錄宣慰兩河衆推其材故有是命遷起居舍人無何范陽以其將朱克融為師鎮州殺節度使田弘正奏呈又以造為鎮州四面河東魏博澤潞橫海深冀易定等軍宣慰

使

文宗太和三年正月癸丑諫議大夫柏耆以奉使召對於延英

九月命監察御史孟瑄往淮南浙右巡察米價

五年七月甲申詔曰蓋天人之際相應如響祥禋之來各惟厥事乃者兵革始罷黎庶甫寧而蜀土載罹震驚方務綏輯今又水潦為沴沉溺實多載省奏章益深惕慮諒以朕澤不逮下誠無感通五事致咎此方何罪夙

夜兢媿憫歎良深宜令戶部郎中李踐方充兩川安撫使

開成元年二月庚寅中書門下奏准赦文諸道黜陟使以給事中盧均司農卿李玘吏部郎中薛廷光太常少卿盧貞刑部郎中房直溫分命之

二年八月丁酉詔曰大河而南幅圓千里楚澤之北連亘數州近以水潦暴至隄防潰溢既壞廬舍復損田苗言念黎元懼此灾沴或生業蕩盡或農收索然困餒凋

殘豈能自濟是用勤約疚于中懷今故臨遣使臣詳問
病害紓其墊溺之苦申以勞來之方勉諭師徒安存孤
老將我惠澤與蘇疲人宜令給事中盧弘宣往許鄭滑
鄆曹濮等道宣慰刑部郎中崔璿往山南等道鄂岳等
道宣慰於戲朕自君臨勵求理道常恐一物失所每以
萬姓為心誠無感通時有災害夙夜媿悼不知所然宣
示藩方喻茲詔命使寬其徭役禁其侵漁多方輯綏俾
速完復布告眚庶知朕意焉

昭宗天復二年三月詔遣諫議大夫張顛示喻太原汴

州使息兵通和

太原後唐太祖也
汴州梁太祖也

後晉高祖天福六年冬十月丁亥朔遣鴻臚少卿魏玘
將作少監霍廷讓左領軍衛將軍安滲右驍衛將軍田
峻于滑濮鄆澶四州察河水害稼處并安撫百姓

周世宗顯德元年八月以諸州編戶皆以雨水害稼上
訴遣兵部郎中麻麟等二十三人分按之

冊府元龜卷一百六十二